

Winde/Hagel vnd Ungewitter/auch ein sehr kalter vnd harter Winter. In Teutschland vnd Italien geschahen Erdbiedem/ vnd Wasserfluthe theten grossen schaden. Ludovicus König in Frankreich schlug den Venedigern viel Volcks ab/vñ gewann die Schlacht. Johannes König in Schweden/ Philippus der Pfaltzgraff vñ Churfürst/ Herzog Albrecht in Bayern/ Papst Julius der ander/vnd der Bisschoff zu Speyer gingen mit todt ab. Anno 1531. erschien ein Comet im Krebs/Lewen/Jungfraw/Wage/darauff folgete auch viel Jammers vñ Unglücks. Der Römische König Ferdinandus führet ein Kriegsheer in Ungern. Engellandt ward vom Schotten angegriffen. Der Türck wütete hefftig in Ungern/vnd kam dem Teutschen Bodem sehr nahe. In Frießlandt/Hollandt/Seelandt vnd Flandern/kam ein groß vnermuthlich Wasser/das grossen schaden thete. In Schwaben/Schweiz/Elsasz vnd andern Orten kam ein grosse thewring/dz viel Menschen durch hunger vñkamen. In Schweiz entstandt ein Krieg von wegen der Religion/in welchem Zwinglius erschlagen. Der Christliche Churfürst zu Sachsen/Herzog Johannes ging mit todt ab. In Portugal zu Lisebona ist desselbigen Jahrs ein Erdbiedem darauff erfolget/in welchem zwey hundert Heuser eingefallen. Anno 1556. hat man einen Cometen gehabt im Krebs/Lewen/Jungfraw/Wage/davon ist ein Sterben vnter das Viehe kommen/auch ist darauff ein vberauß dürrer Sommer erfolget/vñ in Niederlandt ist eine schreckliche thewring gewesen/daz viel Menschen hunger gestorben. Die Pest hat hefftig gewütet. Zwischen Papst Paulo dem vierden/vnd Philippo König in Spannen ist ein mechtig Krieg entstanden. In Lifflandt/Ungern/Welschland vnd Frankreich ist auch ein grosser Tumult vnd Kriegeßwesen erfolget. Zu Regensburg ist ein Convent gehalten worden/da hat der Keyser Ferdinandus wider den Türcken hülffe gebeten. Zwo Churfürsten sind darauff gestorben. Zu Augspurg ist ein groß Wetterleuchten gewesen/Wie denn auch zu Nirekhausen

B

in Be